

Yangi tumanda yangi sanoat korxonasi ishga tushdi



Prezident Shavkat Mirziyoyev 21-aprel kuni Qashqadaryo viloyatiga keldi.

Tashrifdagi birinchi manzil Ko'kdala tumani bo'ldi. Bu ma'muriy birlikni tashkil etish g'oyasi Shavkat Mirziyoyevning saylovoldi dasturidan o'rin olgan edi. Oliy Majlis Senatining shu yil 17 martdagi qaroriga muvofiq, aholiga qulayliklar yaratish hamda urbanizatsiya jarayonlarini tartibga solish maqsadida Chiroqchi tumanining bir qismida Ko'kdala tumani tashkil etildi.

Prezident tashrifi arafasida ushbu yangi tumanda "Chiroqchi klaster" mas'uliyati cheklangan jamiyatining tikuvchilik korxonasi ishga tushirildi. Uning binosi yengil konstruksiyalardan qurilgan. 500 nafarga yaqin mahalliy xotin-qizlar va yoshlar ish bilan ta'minlangan.

Davlatimiz rahbari korxonadagi ish jarayonini ko'zdan kechirdi, xotin-qizlar bilan suhbatlashdi.

- Ko'ryapsizlar, ayollar bo'yicha qancha qarorlar qabul qilyapmiz, tashkiliy choralar ko'ryapmiz. Buning zamiridagi maqsad - sizlarning quvonchingizni ko'rish. Bir ayolni, bir qizimni ish bilan ta'minlasak, uning kayfiyati butun xonadonga ta'sir qiladi, farzandlarini yaxshi o'qitadi. Bugun ham ko'p rejalar, imkoniyatlar bilan keldik. O'zbekistonda orzular amalga oshadigan zamon qurishga harakat qilayapmiz, - dedi Shavkat Mirziyoyev.

Korxonaga yiliga 7 million dona tayyor kiyim ishlab chiqarish quvvatiga ega. Mahsulotlarning katta qismi "Samo" brendi ostida eksport qilinadi. Buning uchun taniqli xorijiy brendlar bilan hamkorlik rejalashtirilgan.

Klaster rahbariga paxta hosildorligini oshirish, yangi yerlarni o'zlashtirish bo'yicha ko'rsatmalar berildi.

Ma'lumki, Yettitom shaharchasi Ko'kdala tumanining ma'muriy markazi etib belgilangan. Endi bu yerda infratuzilmani rivojlantirish zarur. Prezidentimiz ushbu shaharchani batafsil rejalashtirish loyihasi bilan tanishdi.

Tuman hududi 171 ming gektar bo'lib, 32 ta mahalladan iborat. Loyihaga ko'ra, Yettitom shaharchasida

tuman hokimligi va mahalliy idoralar uchun binolar, “Yangi O‘zbekiston” massivi, bog‘cha va maktablar, poliklinika, istirohat bog‘i, xalqaro ahamiyatdagi yo‘l bo‘yida xizmat ko‘rsatish va savdo majmualari barpo etiladi. 159 kilometr yo‘l ta‘mirlanib, 50 kilometr ichimlik suvi, 80 kilometr elektr tarmoqlari quriladi.

Prezidentimiz yangi binolarni energiya tejamkor qilib qurish, uylar tepasiga quyosh energiyasi panellari o‘rnatish zarurligini ta‘kidladi. Ko‘kdalada 500-1000 megavattlik quyosh elektr stansiyalari va quyosh panellari qorxonasini barpo etish imkoniyatini o‘rganish bo‘yicha topshiriq berildi.

Shu yerda aholi vakillari bilan uchrashuv bo‘lib o‘tdi. Ular ilgari Chiroqchi tumani markazigacha 2-3 soatlab yo‘l yurilgani, bu ko‘p qiyinchilik va xarajatlar tug‘dirganini so‘zlab berishdi.

- Ko‘kdala tumanini tashkil etishdan asosiy maqsad bu yerda yashaydigan 182 ming nafar aholi uchun munosib turmush sharoitini yaratish, hududni iqtisodiy rivojlantirish, aholi bandligini ta‘minlash bo‘yicha ishlarimizni yangi bosqichga ko‘tarishdir, - dedi Shavkat Mirziyoyev.

Shu maqsadda tumanni kompleks ijtimoiy-iqtisodiy rivojlantirish bo‘yicha 3 yillik dastur ishlab chiqilishi ta‘kidlandi. Bu yerda muhandislik-kommunikatsiya tarmoqlari va ijtimoiy soha ob‘ektlarini barpo etish uchun qariyb 2 trillion so‘m mablag‘lar yo‘naltiriladi. Joriy yilda 260 milliard so‘mlik 18 ta loyiha ishga tushiriladi.







Ўзбекистон Республикаси Президентининг
МАТБУОТ ХИЗМАТИ

Manba